



JAVNO PREDUZEĆE
ŠUMSKO PRIVREDNO DRUŠTVO
ZENIČKO – DOBOJSKOG KANTONA
d.o.o. ZAVIDOVIĆI

Alije Izetbegovića br. 25
Tel. 032 877 834; Fax 032 879 029

Upisano u Registar Kantonalnog suda u Zenici
pod brojem: I-9014, Rješenje br. U/I 916/04
ID br.: 4218431050005
PDV b.r.: 218431050005 Por. br.:05072148
Transakcijskiračuni:
Union banka d.d. Sarajevo 1020320000013296
IK banka d.d. Zenica 1340300000062287
UniCredit banka Mostar 3384202214508407
Raiffeisen banka Sarajevo 1610550016400016

PRAVILNIK

o unutarnjem redu i čuvarskoj službi Spomenika prirode „Tajan“

Zavidovići, 2015. godina

Na osnovu člana 9. Statuta Javnog preduzeća „Šumsko-privredno društvo Zeničko-dobojskog kantona“ d.o.o. Zavidovići, Nadzorni odbor preduzeća, dana 17.09.2015. godine donio je sljedeći:

P R A V I L N I K

o unutarnjem redu i čuvarskoj službi Spomenika prirode „Tajan“

I OSNOVNE ODREDBE

Član 1.

Ovim pravilnikom regulišu se unutarnji red, organizacija, način rada i oprema čuvarske službe i osnovna pravila organizacije protivpožarne zaštite Spomenika prirode "Tajan" (u daljem tekstu: Spomenik prirode), odnosno bliže propisuju pravila iz člana 158. Zakona o zaštiti prirode FBiH ("Službene novine Federacije BiH", broj 66/13), u daljem tekstu: Zakon, po kojima se na području Spomenika prirode sprovodi režim zaštite utvrđen Zakonom o proglašenju Spomenika prirode "Tajan" ("Službene novine Zeničko-dobojskog kantona", broj 3/2008), u daljem tekstu: Zakon SP "Tajan".

Član 2.

Odredbe ovog pravilnika odnose se na korisnike zaštićenog područja, odnosno na lica koja vrše poslove na području Spomenika prirode, kao i na posjetioce Spomenika prirode.

Posjetilac Spomenika prirode je lice koje iz naučnih, obrazovnih, rekreativnih, turističkih, sportskih i kulturnih potreba i razloga boravi na području Spomenika prirode kraće od 15 dana, kao i lice u tranzitu kroz područje Spomenika prirode (u daljem tekstu: Posjetilac).

Član 3.

Zakonom o proglašenju Spomenika prirode „Tajan“ upravljanje Spomenikom prirode je povjereno Javnom preduzeću Šumsko privredno društvo Zeničko - dobojskog kantona d.o.o. Zavidovići.

Poslove upravljanja neposredno vrši Poslovna jedinica Spomenik prirode „Tajan“, Javnog preduzeća Šumsko privredno društvo Zeničko - dobojskog kantona d.o.o. Zavidovići, uprava u Kamenici (u daljem tekstu: Upravitelj).

Član 4.

Korisnici i Posjetioci dužni su da se pridržavaju Zakona o zaštiti prirode FBiH, Zakona o proglašenju Spomenika prirode „Tajan“, podzakonkih akata i odredaba ovog pravilnika, uputstava sa informativnih tabli i drugih oznaka, kao i uputstava ili naloga čuvara Spomenika prirode i drugih ovlaštenih lica Upravitelja.

U planiranju i preduzimanju radova i aktivnosti na području Spomenika prirode, korisnici i Posjetioci dužni su da poštuju Zakon o proglašenju Spomenika prirode „Tajan“ i Plan upravljanja Spomenika prirode "Tajan".

Član 5.

Za korištenje određenih usluga na području Spomenika prirode, korisnici i Posjetioči plaćaju naknadu Upravitelju.

Visinu, način obračuna i naplate naknade Upravitelj je propisao Cjenovnikom uluga Spomenika prirode „Tajan“, uz saglasnost Javnog preduzeća Šumsko privredno društvo Zeničko - dobojskog kantona d.o.o. Zavidovići.

Član 6.

Unutarnji red Spomenika prirode Upravitelj obezbjeđuje organizovanjem čuvarske službe, saradnjom sa lokalnim stanovništvom, javnim preduzećima i drugim privrednim subjektima, ustanovama i udruženjima građana, kao i saradnjom sa organima državne uprave i lokalne samouprave.

II KRETANJE I BORAVAK POSJETILACA

Član 7.

Ulazak u Spomenik prirode je slobodan i bez ograničenja, osim na mjestima, u vrijeme i na način utvrđenim ovim pravilnikom.

Član 8.

Ulazak u Spomenik prirode motornim vozilom može se zabraniti ili ograničiti, u skladu sa posebnim propisom, ako se radi o transportu opasnih materija.

Upravitelj može kratkotrajno zaustavljati motorna vozila na ulasku u Spomenik prirode ukoliko na javnom putu postavi ulaznu stanicu u skladu sa Zakonom.

Način postavljanja i rada ulaznih stanica Upravitelj će propisati posebnim aktom, u skladu sa Zakonom.

Član 9.

Kada se radi o hitnoj intervenciji u slučaju požara, elementarne nepogode ili udesa ili namjenskom korištenju postojećih šumskih i drugih službenih puteva, odobrenje ili pratnja se ne mora pribaviti, već se te aktivnosti u što kraćem roku prijavljuju Upravitelju.

Član 10.

Površine, mjesta i objekti na kojima je zabranjena posjeta su naročito:

- 1) staništa od prioritetnog značaja za zaštitu odnosno mjesta od posebnog značaja za očuvanje strogo zaštićenih vrsta;
- 2) površine, mjesta i objekti za reintrodukciju biljnih i životinjskih vrsta i prihranu ptica i drugih životinja;
- 3) prostor oko stabala drveća na kojima se nalaze gnijezda značajnih vrsta ptica poluprečnika 50 metara, gde se zabranjuje pristup u reprodukcionom periodu;
- 4) površine koje svojim položajem i stanjem mogu da ugroze korisnike i posjetioce (opasna mjesta)

Navedene površine, mjesta i objekte ovog člana Upravitelj će označiti na vidljiv i jasan način.

Član 11.

Kampovanje i logorovanje van građevinskih parcela i okućnica stalnih domaćinstava, porodičnih objekata za odmor i turističko-ugostiteljskih objekata dopušteno je jedino na mjestima posebno određenim Planom upravljanja ili prostornim planom i uređenim za te namjene.

Izuzetno od odredbe stava 1. ovog člana, kampovanje ili logorovanje može se organizovati uz pratnju čuvara ili odobrenje Upravitelja na drugom mjestu, u kratkom trajanju i za manji broj lica, a za potrebe istraživačkog rada i ekoturizma.

Loženje vatre na otvorenom ognjištu, izvan mjesta određenih za kampovanje i logorovanje, dozvoljeno je samo na posebno uređenim i obilježenim ložištima, uz prijavu čuvarskoj službi Spomenika prirode.

Zabranjeno je kampovanje, logorovanje i loženje vatre suprotno odredbama st. 1, 2. i 3. ovog člana.

III ZAŠTITA PRIRODNIH I KULTURNIH VRIJEDNOSTI I ŽIVOTNE SREDINE

Član 12.

Korisnici i Posjetioci dužni su da primjenjuju mjere zaštite prirodnih, kulturnih i drugih vrijednosti i životne sredine u skladu sa Zakonom o zaštiti prirode, Planom upravljanja i ovim pravilnikom, mjerodavnim zakonima i propisima donesenim na osnovu tih zakona.

Član 13.

Biljke i gljive koje žive u slobodnoj prirodi na području Spomenika prirode, nije dozvoljeno sjeći, kidati, lomiti, čupati, sakupljati njihovo sjeme i plodove ili ih na drugi način oštećivati i uništavati.

Životinje koje žive, povremeno ili sezonski borave u slobodnoj prirodi na području Spomenika prirode, nije dozvoljeno rastjerivati, uznemiravati, hvatati, ubijati i ranjavati, nehotično i namjerno trovati, sakupljati jaja i druge razvojne oblike, uništavati i oštećivati gnijezda i ostala mjesta i objekte na kojima se te životinje razmnožavaju, odgajaju mladunce, sklanjaju, borave i hrane.

Lice koje na području Spomenika prirode nađe zaštićenu divlju životinju utvrđenu Zakonom o lovstvu i važećim propisima o lovstvu, obavezno je da svoj nalaz bez odlaganja prijavi čuvaru ili drugom ovlaštenom licu Upravitelja.

Zabranjeno je postupanje sa strogo zaštićenim vrstama divljih biljaka, životinja i gljiva suprotno odredbama st. 1, 2. i 3. ovog člana.

Član 14.

Na području Spomenika prirode zabranjeno je sakupljanje svih biljnih i životinjskih vrsta.

Član 15.

Na području Spomenika prirode zabranjena je sadnja neautohtonih biljnih zajednica i unošenje neautohtonih životinjskih vrsta, kao i unošenje genetski modificiranih vrsta.

Član 16.

Upravitelj će na pogodan način javno prikazati i učiniti dostupnim korisnicima i Posjetiocima spiskove vrsta divlje flore i faune na području Spomenika prirode "Tajan" sa informacijama od značaja za njihovo prepoznavanje, zaštitu i režim korištenja.

Član 17.

Zabranjeno je uzimati iz prirode geološka i paleontološka dokumenta odnosno fosile, minerale i kristale, koji su proglašeni zaštićenim prirodnim dobrima ili se nalaze na objektu geonasljeđa i zaštićenom nalazištu.

Nalazač geoloških i paleontoloških dokumenata iz stava 1. ovog člana koja bi mogla predstavljati zaštićenu prirodnu vrijednost, dužan je da iste prijavi Upravitelju, a Upravitelj nadležnom Ministarstvu u roku od 8 dana od dana pronalaska i preduzme mjere zaštite od uništenja, oštećivanja ili krađe.

Zabranjeno je oštećivanje, uništavanje, iznošenje i prisvajanje primjeraka biljaka i životinja, minerala, kristalnih tvorevina, fosilnih ostataka i artefakata iz pećina i kraških jama, rasturanje i iznošenje guana, ostavljanje otpadaka, upotreba materija kojima se mogu zagaditi vode, ispisivanje grafita i loženje vatre u tim objektima.

Član 18.

Zabranjeno je oštećivati i uništavati predmete i objekte koji imaju kulturno-istorijsku vrijednost, odnosno svojstvo ili status evidentiranog ili utvrđenog kulturnog dobra.

Zabranjeno je raskopavanje mjesta na kojima su konstatovani ili osnovano pretpostavljeni arheološki nalazi, niti njihovo zauzeće izgradnjom objekata i drugim radovima.

Član 19.

Zabranjeno je obavljati radove i druge aktivnosti kojima se mogu izazvati nepovoljne promjene životne sredine, odnosno zagaditi tlo, voda i vazduh, stvarati prekomjerna buka i indukovati zračenje štetno po ljude i živi svijet, a shodno propisima koji regulišu oblast zaštite životne sredine.

IV OBAVLJANJE DJELATNOSTI I KORIŠTENJE PRIRODNIH RESURSA

Član 20.

Na području Spomenika prirode zabranjena je eksploatacija mineralnih sirovina i prirodnih bogatstava, osim sanitarne sječe i najnužnijih uzgojnih sječa.

Član 21.

Na području Spomenika prirode po potrebi se obezbjeđuju naučna istraživanja, provodi se kontrola i praćenje stanja populacija biljnih i životinjskih vrsta, vrši se prikupljanje i analiza podataka i preduzimanje mjera radi očuvanja zdravstvenog stanja i vitalnosti istih.

V LOV I RIBOLOV

Član 22.

Na području Spomenika prirode zabranjen je lov i ribolov, osim za potrebe održavanja zdravstvenog stanja i brojnosti divljači.

VI SPORT, REKREACIJA I TURIZAM

Član 23.

Na području Spomenika prirode mogu se organizovati sportska takmičenja i aktivnosti rekreacije na vodi i snijegu, u ronjenju, planinarstvu, alpinizmu i speleologiji, biciklizmu, paraglajdingu i drugim oblastima ukoliko se tim aktivnostima ne oštećuju ili ugrožavaju prirodne vrijednosti i kvalitet životne sredine.

Za takmičenja iz stava 1. ovog člana organizator pribavlja odobrenje Upravitelja i plaća naknadu u skladu sa opštim aktom koji donosi Upravitelj.

Organizator je dužan da takmičenje prijavi Upravitelju najmanje 15 dana prije dana planiranog za njegov početak.

Zabranjeno je organizovanje takmičenja bez odobrenja Upravitelja i protivno uslovima datim u odobrenju.

Član 24.

Na području Spomenika prirode pravna i fizička lica mogu obavljati djelatnost turizma i ugostiteljstva, odnosno organizovati turistička putovanja i turističku posjetu i pružati usluge smještaja, ishrane i pića u skladu sa odredbama Zakona o turizmu, Zakona o zaštiti prirode, Zakona o proglašenju Spomenika prirode "Tajan", podzakonskih akata i ovog pravilnika.

Član 25.

Turističke grupe i pojedinci mogu u pratnji čuvara ili drugog ovlaštenog lica Upravitelja posjećivati i razgledati lokalitete i površine zaštićenog područja iz obrazovnih i opštekulturnih razloga i potreba.

Upravitelj može za zainteresovane turističke grupe organizovati obilazak i drugih dijelova područja Spomenika prirode.

Namjeravane posjete odnosno obilazak iz st. 1. i 2. ovog člana prijavljuju se Upravitelju najmanje 24 sata ranije.

Član 26.

Za obavljanje djelatnosti turizma i ugostiteljstva iz člana 24. ovog pravilnika i za usluge Upravitelja iz člana 25. ovog pravilnika, plaća se naknada u skladu sa Cjenovnikom usluga Spomenika prirode "Tajan"

VII IZGRADNJA OBJEKATA I UREĐENJE PROSTORA

Član 27.

Na području Spomenika prirode zabranjena je izgradnja objekata, osim postavke privremenih montažnih objekata bez temeljenja, turističkih objekata, edukacionih centara i kuća za odmor od prirodnog materijala prilagođenog okolišu i ambijentu, a koji su u funkciji Spomenika prirode. Zabranjeno je izvođenje građevinskih radova i drugih radova kojima bi se narušila morfologija terena, uništila divlja flora i fauna ili na bilo koji način narušio integritet zaštićenog područja. Dozvoljeno je uređenje i obilježavanje staza za šetnju i mjesta za razgledanje i odmor, unapređenje infrastrukture za rekreaciju, te izgradnja parking prostora.

VIII ODRŽAVANJE ČISTOĆE I UPRAVLJANJE OTPADOM

Član 28.

Održavanje čistoće i upravljanje otpadom na području Spomenika prirode vrši se u skladu sa Zakonom o komunalnim djelatnostima Zeničko-dobojskog kantona ("Službene novine Zeničko-dobojskog kantona", broj: 17/08), propisima donesenim na osnovu tog zakona, drugim zakonima i propisima koji se odnose na otpadne materije, Planom upravljanja Spomenikom prirode "Tajan" i ovim pravilnikom.

Na području Spomenika prirode zabranjeno je deponovanje smeća i drugog otpadnog materijala.

Član 29.

Svako je dužan da sakuplja i odlaže otpatke koje stvara, na mjestima koja su posebno uređena, odnosno opremljena i prema potrebi, obilježena za te namjene.

Upravitelj će postaviti odgovarajuću opremu, odnosno kante, korpe ili kese za privremeno odlaganje čvrstih otpadaka na mjestima koja su predmet posjete i organizovati njihovo pražnjenje i odvoženje izvan područja Spomenika prirode.

IX OBILJEŽAVANJE I POSTAVLJANJE OZNAKA, FOTOGRAFISANJE I SNIMANJE FILMOVA

Član 30.

Upravitelj na način propisan odgovarajućim podzakonskim aktom obilježava Spomenik prirode kao zaštićeno područje tablama propisanog izgleda, a granice Spomenika prirode obilježava propisanim oznakama.

Upravitelj odgovarajućim tablama obilježava mjesta i objekte gdje je pristup i boravak zabranjen ili ograničen.

Upravitelj postavlja table odnosno druge oznake sa informacijama o pravilima unutaršnjeg reda.

Upravitelj postavlja i druge table i oznake od značaja za sprovođenje režima zaštite i prezentaciju vrijednosti Spomenika prirode.

Zabranjeno je oštećivanje ili uništavanje i uklanjanje tabli i natpisa na tablama i drugih oznaka iz ovog člana, kao i njihovo zaklanjanje, odnosno maskiranje drugim objektima.

Član 31.

Na području Spomenika prirode nije dozvoljeno postavljanje informativnih tabli sa nazivima pravnih i fizičkih lica i reklamnih i drugih panoa.

Član 32.

Fotografisanje i snimanje tonških i video zapisa i filmova na području Spomenika prirode dozvoljeno je.

Za radnje iz stava 1. ovog člana koji su predviđeni za širu publikaciju potrebno je pribaviti saglasnost Upravitelja.

Radi pribavljanja saglasnosti, organizator snimanja, odnosno zainteresovano lice prijavljuje planirane aktivnosti snimanja Upravitelju koji je dužan da saglasnost izda u roku ne dužem od 15 dana.

Za aktivnosti fotografisanja i snimanja zainteresovano lice će prema potrebi i obavještenju Upravitelja pribaviti akt o uslovima zaštite prirode koje izdaje nadležno Ministarstvo.

Upravitelj može privremeno ili trajno uskratiti saglasnost ukoliko može doći do značajnog nepovoljnog uticaja na prirodne vrijednosti.

Fizičko ili pravno lice koje obavlja ili za čiji račun se obavlja snimanje fotografija, tonških i video zapisa i filmova koji se publikuju, odnosno prikazuju javnosti, dužno je da jedan primjerak snimljenog materijala dostavi Upravitelju.

X ISTRAŽIVAČKI I OBRAZOVNI RAD

Član 33.

Na području Spomenika prirode mogu se obavljati aktivnosti naučno-istraživačkog rada.

Naučno istraživanje iz stava 1. ovog člana dopušteno je obavljati na način da se ne izazovu značajne nepovoljne promjene ili unište prirodne vrijednosti, kao i da se ne zagađi životna sredina.

Član 34.

Za istraživanja koja mogu imati uticaj na vrijednosti i obilježja Spomenika prirode i za koja je u smislu Zakona o zaštiti prirode neophodno pribaviti akt o uslovima zaštite prirode, nosilac istraživanja pribavlja saglasnost Upravitelja.

Da bi pribavio saglasnost iz stav 1. ovog člana, nosilac istraživanja prijavljuje Upravitelju planirane istraživačke radove i aktivnosti.

Prijava istraživanja sadrži mjerodavne podatke o vrsti, cilju, sadržaju, lokaciji, vremenu trajanja, metodama, sredstvima, opremi i alatima, rukovodiocu i učesnicima istraživanja. U prijavi se mogu navesti i usluge, odnosno pomoć koja se traži od Upravitelja.

Uz prijavu istraživanja prilaže se akt o uslovima zaštite prirode.

Uz prijavu istraživanja, za čije izvođenje je propisana obaveza pribavljanja dozvole, prilaže se i dozvola nadležnog ministarstva u skladu sa zakonom.

Saglasnost iz stava 1. ovog člana, koju Upravitelj izdaje u roku ne dužem od sedam dana od dana prijema prijave, sadrži uputstvo o primjeni uslova i mjera zaštite prirode i pravila unutrašnjeg reda, posebne uslove, ako ih ima, u vezi mjesta, vremena i načina izvođenja radova, obezbjeđenja pratnje čuvara ili drugog lica, kao i mogućnost i uslove pružanja traženih usluga.

Zabranjeno je istraživanja iz stava 1. ovog člana započeti ili izvoditi bez pribavljene saglasnosti Upravitelja.

Član 35.

Upravitelj može u postupku izdavanja saglasnosti odrediti drugo vrijeme od onog koje je navedeno u prijavi ako ocjeni da postoji rizik po prirodne vrijednosti, bezbjednost i zdravlje ljudi, o čemu obavještava podnosioca prijave prije izdavanja saglasnosti.

Upravitelj iz razloga navedenih u stavu 1. ovog člana ili nepoštovanja propisanih uslova može pismeno naložiti prekid istraživačkih radova i aktivnosti.

Član 36.

O istraživanjima u oblasti šumarstva, poljoprivrede i pedologije, hidrologije, klimatologije i meteorologije, životne sredine, turizma, saobraćaja, energetike, prostornog i urbanističkog planiranja, demografije, kulturnih dobara i u drugim oblastima za koja se po pravilu ne pribavlja saglasnost Upravitelja, potrebno je da nosilac istraživanja blagovremeno pismeno obavjesti Upravitelja.

Obavještenje sadrži istu vrstu podataka kao i prijava istraživanja.

Upravitelj će odmah, a najkasnije u roku od dva dana od prijema obavještenja, pružiti pismeni odgovor podnosiocu obavještenja da je upoznat sa planiranim istraživanjima, mogućnostima pružanja traženih usluga i pomoći, dati preporuke u vezi poštovanja pravila unutrašnjeg reda i uputiti podnosioca obavještenja na eventualnu obavezu pribavljanja akta o uslovima zaštite prirode.

Zabranjeno je da se istraživanja iz stava 1. ovog člana započnu ili izvode ukoliko se o njima ne obavjesti Upravitelj.

Član 37.

Obrazovne aktivnosti na području Spomenika prirode, kao što su škola u prirodi, terenska nastava i seminari i stručne ekskurzije potrebno je blagovremeno pismeno prijaviti Upravitelju.

Aktivnosti iz stava 1. ovog člana ne mogu započeti prije nego što Upravitelj potvrdi prijem prijave tih aktivnosti. Prijava namjeravanih obrazovnih aktivnosti mora sadržati relevantne podatke o vrsti, cilju, sadržaju, vremenu trajanja, organizatoru i broju učesnika. U prijavi se mogu navesti i usluge, odnosno pomoć koja se očekuje od Upravitelja.

Upravitelj će odmah, a najkasnije u roku od dva dana pismeno potvrditi prijem prijave obrazovnih aktivnosti i obavjestiti podnosioca prijave o posebnim uslovima zaštite prirode i životne sredine prilikom obavljanja aktivnosti, ako ih ima, kao i o mogućnostima i uslovima pružanja traženih usluga ili pomoći.

Član 38.

U roku od 15 dana po završetku terenskih istraživačkih radova i obrazovnih aktivnosti, nosilac istraživanja, odnosno organizator obrazovnih aktivnosti dužan je da Upravitelju dostavi kratak izvještaj o toku i glavnim rezultatima sprovedenih istraživanja i obrazovnih aktivnosti.

O završetku elaborata, odnosno publikovanju rezultata o izvršenim istraživanjima nosilac istraživanja dužan ja da obavjesti Upravitelja u roku od 15 dana kao i da taj elaborat ili publikovani rad dostavi Upravitelju.

Onome ko blagovremeno ne podnese izvještaj iz stava 1, odnosno ne dostavi obavještenje i elaborat ili rad iz stava 2. ovog člana, Upravitelj može uskratiti saglasnost za naredna istraživanja odnosno obavještenje i usluge za obavljanje obrazovnih aktivnosti.

XI ČUVARSKA SLUŽBA

Član 39.

Sprovođenje pravila unutrašnjeg reda obezbjeđuje i neposredni nadzor na području Spomenika prirode vrši Čuvarska služba Poslovne jedinice Spomenik prirode "Tajan".

Čuvarsku službu čine, odnosno poslove čuvarske službe u svojstvu lica sa zakonskim ovlaštenjima i obavezama neposredno obavljaju nadzornik lovišta, lovočuvar i rendžer.

Čuvar može istovremeno obavljati i poslove čuvara šuma, lovočuvara ili ribočuvara, a nadzornik lovišta i druge poslove u okviru radnog mjesta i stručne spreme kojom raspolaže.

Čuvar je za svoj posao u čuvarskoj službi neposredno odgovoran nadzorniku lovišta, a nadzornik lovišta je za svoj posao u čuvarskoj službi neposredno odgovoran Rukovodiocu Poslovne jedinice Spomenik prirode "Tajan".

Broj čuvara utvrđuje JP ŠPD ZDK d.o.o. Zavidovići aktom o sistematizaciji poslova i radnih mjesta, a vrsta i obim konkretnih poslova koje čuvar obavlja utvrđuje se ugovorom o radu ili drugim pojedinačnim aktom, u skladu sa zakonom.

Član 40.

Za vrijeme službe, čuvar nosi službenu odjeću na kojoj je znak Spomenika prirode "Tajan" i znak JP ŠPD ZDK d.o.o. Zavidovići.

Do donošenja akta kojim nadležni ministar (u daljem tekstu: Ministar) propisuje jedinstvenu uniformu čuvara nacionalnih parkova i zaštićenih područja, čuvar će nositi službenu uniformu JP ŠPD ZDK d.o.o. Zavidovići.

Član 41.

Čuvar za vrijeme službe nosi oružje.

Vrstu, uslove i pravila nošenja i upotrebe i način čuvanja oružja utvrđuje Upravitelj u skladu sa zakonom.

Član 42.

Čuvar posjeduje službenu legitimaciju kojom dokazuje identitet, status službenog lica i ovlaštenja u skladu sa Zakonom.

Čuvar je dužan da u vršenju odgovarajućih službenih radnji prethodno pokaže službenu legitimaciju.

Službenu legitimaciju čuvaru izdaje Upravitelj na obrascu koji propisuje nadležni Ministar.

O izdatim legitimacijama Upravitelj vodi evidenciju.

Čuvar koji je prestao da vrši čuvarsku službu, dužan je da službenu legitimaciju u roku od tri dana od dana prestanka službe vrati Upravitelju, koju će Upravitelj odmah poništiti i tu činjenicu unijeti u evidenciju iz stava 4. ovog člana.

U slučaju gubitka ili nestanka službene legitimacije čuvar je dužan da o ovome odmah obavjesti Upravitelja.

Izgubljena ili nestala legitimacija briše se iz evidencije o izdatim legitimacijama, a čuvaru se izdaje nova legitimacija.

Član 43.

Rad čuvarske službe organizuje se na terenu tako što čuvar vrši neposredni nadzor i kontroliše sprovođenje pravila unutrašnjeg reda na cijelom čuvarskom rejonu.

Čuvarski rejon u smislu ovog pravilnika, čine granice Poslovne jedinice Spomenik prirode „Tajan“.

Čuvar je odgovoran za unutrašnji red u rejonu za koji je zadužen.

Član 44.

U vršenju čuvarske službe, dužnost čuvara je da:

1) prati odnosno nadgleda kretanje i aktivnosti Posjetilaca i drugih korisnika, posebno vezanim za:

– gradnju, rekonstrukciju i dogradnju objekata, transport građevinskog materijala i druge radove koji se u skladu sa zakonom smatraju izgradnjom objekata,

– korištenje mineralnih sirovina, odnosno kamena, šljunka, pijeska, zemlje i treseta,

– korištenje šuma, odnosno sječu, krčenje, kresanje i paljenje drveća, izvlačenje, odlaganje i transport drvnih sortimenata, sakupljanje sjemena i drugo,

– korištenje flore i faune, odnosno sakupljanje i branje biljaka, gljiva i životinja i njihovih razvojnih oblika i šumskih plodova i drugo,

– lov, gajenje i korištenje divljači,

– ribolov,

– upotrebu motornih vozila i plovila,

- postavljanje objekata na vodi i montažnih i privremenih objekata,
- ulazak u zone, mjesta i objekte u kojima je posjeta zabranjena ili ograničena,
- kampovanje, logorovanje,
- loženje vatre na otvorenom i primjenu pravila i mjera zaštite od požara,
- organizaciju i odvijanje sportskih takmičenja i drugih manifestacija,
- odlaganje otpada;

2) prati stanje biljnih i životinjskih vrsta i drugih vrijednosti Spomenika prirode i vodi evidenciju o njima,

3) pruža podatke, pomoć i usluge Posjetiocima pri obilasku i razgledanju Spomenika prirode,

4) prati i pruža druge potrebne usluge organizatorima i učesnicima naučnih i drugih istraživanja i obrazovnih aktivnosti,

5) saraduje sa nadležnim inspektorom i obavještava o stvarima iz njegove nadležnosti,

6) saraduje sa organom unutrašnjih poslova i prema ukazanoj potrebi traži njegovu pomoć,

7) sastavlja zapisnik, obavještava nadzornika lovišta i Rukovodioca Poslovne jedinice i obavlja druge ovdje nespomenute poslove, u skladu sa zakonom i aktom Upravitelja,

8) obavještava po potrebi drugi nadležni organ o izvršenju zabranjenih, odnosno protivpravnih radnji koje su regulisane propisima iz nadležnosti tog organa i o njihovim izvršiocima ukoliko su poznati.

Član 45.

Kada čuvar utvrdi ili osnovano pretpostavi da je Posjetilac, odnosno korisnik zaštićenog područja učinio radnju suprotno pravilima unutrašnjeg reda ili mjerama zaštite prirode propisanim u skladu sa zakonom, ovlašten je da:

1) legitimise lice zatečeno u vršenju nedozvoljenih radnji, a lice zatečeno bez ličnih isprava čiji mu identitet nije poznat, prijavi nadležnom organu unutrašnjih poslova,

2) zatraži da mu lice predoči/pokaže saglasnost, dozvolu, odobrenje, prijavu radova, ulaznicu ili drugi dokument kojim dokazuje status korisnika, odnosno Posjetioca i neko od prava u vezi radova i aktivnosti koje obavlja,

3) izvrši pregled svih vrsta vozila i tovara,

4) izvrši svaki pregled, osim objekata i drugih prostoriya za čiji je pregled potreban sudski nalog, a posebno pregled:

- prtljaga i ličnih stvari,

- ulova i sredstava za lov i ribolov,

- alata i sredstava za sakupljanje biljaka i životinja,

5) privremeno oduzme predmete i sredstva kojima je izvršen prekršaj ili krivično djelo i predmete koji su nastali ili pribavljeni izvršenjem takvog djela, uključujući dijelove i primjerke živog i neživog svijeta, kao i da ove predmete, bez odlaganja, preda Upravitelju zaštićenog područja radi čuvanja,

6) zatraži uspostavljanje prethodnog stanja, odnosno naredi mjere za sprečavanje i uklanjanje štetnih posljedica, a posebno:

- privremeno zabrani radove i aktivnosti koje se obavljaju bez propisanih saglasnosti ili odobrenja, kao što su naučna i druga istraživanja, obrazovne i sportske aktivnosti i sl.,
- zabrani na licu mjesta radove i aktivnosti koje se obavljaju protivno odredbama ovog pravilnika i pravilima protivpožarne zaštite,
- naredi puštanje na slobodu, odnosno vraćanje u prirodu zdravih i nepovređenih primjeraka životinja, ukoliko je to za njih bezbjedno.

Član 46.

Kada utvrdi radnju učinjenu suprotno pravilima unutarnjeg reda ili mjerama zaštite prirode propisanim u skladu sa zakonom, čuvar sastavlja zapisnik.

Sadržaj zapisnika ili opis koji se unosi u zapisnik je saopštavanje onog što je zatečeno, nađeno, utvrđeno ili na drugi način pribavljeno i konstatovano.

U sadržaj se obavezno unose:

- podaci o izvršiocima nedozvoljenih radnji, a ako je izvršilac nepoznat to se konstatuje uz osnovanu pretpostavku o mogućem izvršiocu,
- način i vrijeme izvršenja radnje, sredstva i alati kojima je radnja izvršena,
- podaci o svjedocima i drugim raspoloživim dokazima ako postoje,
- nastala šteta, dokumentovana što preciznijim podacima i po mogućnosti fotografijom,
- podaci o oduzetim predmetima i sredstvima iz tačke 5) člana 45.

Zapisnik je sastavljen u onolikom broju primjeraka koliko zahtjeva konkretna situacija, a ako je kontroli prisutna neka druga zainteresovana strana, jedan primjerak zapisnika uručuje se i njoj.

Upravitelj će propisati obrazac zapisnika iz ovog člana.

Član 47.

O privremeno oduzetim predmetima iz člana 45. čuvar izdaje potvrdu sa tačnim podacima o vrsti i količini.

Upravitelj obezbjeđuje uslove za održavanje i čuvanje privremeno oduzetih predmeta i preduzima radnje za dalje postupanje za primjercima oduzetih i nađenih životinjskih ili biljnih vrsta, minerala, kristalnih tvorevina, fosilnih ostataka i artefakata, uključujući njihovo zbrinjavanje dok se stvar ne riješi.

O privremeno oduzetim predmetima Upravitelj vodi evidenciju sa podacima o vrsti, količini, razlogu privremenog oduzimanja, licu kome su predmeti privremeno oduzeti i čuvaru koji je predmete privremeno oduzeo.

Član 48.

Čuvar u vršenju službe postupa stručno, autoritativno i odgovorno, u skladu sa ovlaštenjima koja ima, vodeći posebno računa o ugledu Upravitelja.

Čuvar vodi službenu knjigu, odnosno evidenciju dnevnih aktivnosti, čiji sadržaj propisuje Upravitelj.

Član 49.

Upravitelj po potrebi sam organizuje ili na drugi način obezbjeđuje obuku, stručno usavršavanje i provjeru znanja i vještina čuvara.

Član 50.

Čuvar je opremljen i radnom odjećom, sredstvima veze i prijevoza, potrebnim aparatima i instrumentima i alatom, u skladu sa posebnim aktom Upravitelja.

Član 51.

Na osnovu zapisnika i obavještenja čuvara o učinjenoj zabranjenoj, odnosno protivpravnoj radnji, Upravitelj shodno stečenim okolnostima, vrsti djela i statusu počinioca podnosi odgovarajuću prijavu ili zahtjev za pokretanje prekršajnog postupka.

XII PROTIVPOŽARNA ZAŠTITA

Član 52.

Na području Spomenika prirode planiraju se i provode mjere zaštite od požara u skladu sa Zakonom o zaštiti od požara, Pravilnikom o zaštiti od požara JP ŠPD ZDK d.o.o. Zavidovići, Planom upravljanja Spomenika prirode „Tajan“ i planovima zaštite od požara.

Upravitelj donosi plan zaštite od požara za područje Spomenika prirode shodno Zakonu o zaštiti od požara.

JP ŠPD ZDK d.o.o. Zavidovići u skladu sa Zakonom o šumama donosi plan zaštite šuma od požara za šumsko područje kome pripada područje Spomenika prirode „Tajan“.

Planom i programom upravljanja Spomenika prirode utvrđuju se prioritetni, odnosno godišnji operativni zadaci protivpožarne zaštite.

Upravitelj će na pogodan način objaviti, odnosno javno istaknuti izvode iz planova zaštite od požara, sa osnovnim pravilima protivpožarne zaštite i postaviti odgovarajuće oznake na terenu.

XIII KAZNENE ODREDBE

Član 53.

Za fizička i pravna lica koja prekrše odredbe ovog pravilnika primjenjivaće se kaznene mjere propisane Zakonom o zaštiti prirode FBiH, odnosno Zakonom o proglašenju Spomenika prirode "Tajan".

XIV PRELAZNE I ZAVRŠNE ODREDBE

Član 54.

Nadzor nad primjenom ovog pravilnika vrši resorno Ministarstvo.

Član 55.

Upravitelj će najkasnije u roku od šest mjeseci od dana stupanja na snagu ovog pravilnika donijeti akta predviđena ovim pravilnikom.

Član 56.

Upravitelj će izvod iz ovog pravilnika, sa osnovnim pravilima unutarnjeg reda i zabranjenim radnjama odnosno aktivnostima istaknuti na pogodan i vidan način u naseljima, turističkim centrima i lokalitetima, objektima JP ŠPD ZDK d.o.o. Zavidovići i na svim drugim odgovarajućim mjestima.

Član 57.

Pravilnik je dostupan javnosti i svako ima pravo uvida u isti.

Član 58.

Izmjene i dopune ovog Pravilnika donosi Nadzorni odbor preduzeća, uz prethodno pribavljenu saglasnost Ministarstva.

Član 59.

Ovaj Pravilnik stupa na snagu danom donošenja od strane Nadzornog odbora JP ŠPD ZDK d.o.o. Zavidovići, uz prethodno pribavljenu saglasnost Ministarstva.

Broj: 02-E-134/15

Datum: 17.09.2015. GODINE



Predsjednik Nadzornog odbora
JP ŠPD ZDK d.o.o. Zavidovići

B. Klenić



JAVNO PREDUZEĆE
ŠUMSKO PRIVREDNO DRUŠTVO
ZENIČKO – DOBOJSKOG KANTONA
d.o.o. ZAVIDOVIĆI

Alije Izetbegovića br. 25
Tel. 032 868 341 ; Fax 032 879 029

Upisano u Registar Kantonalnog suda u Zenici
pod brojem: I-9014, Rješenje br. U/I 916/04
ID br.: 4218431050005
PDV b.r: 218431050005
Por. br.: 05072148
Transakcijski računi:
Union banka d.d. Sarajevo 1020320000013296
IK banka d.d. Zenica 1340300000062287

NADZORNI ODBOR

Broj : 02-E-134/15

Datum: 17.09.2015. godine

Na osnovu člana 9. Statuta Javnog preduzeća „Šumsko-privredno društvo Zeničko-dobojskog kantona“ d.o.o. Zavidovići (Službene novine Zeničko-dobojskog kantona broj:13/05; 21/07; 13/08; 7/11; 9/11 i 12/12) i člana 28. Poslovnika o radu Nadzornog odbora Javnog preduzeća „Šumsko-privredno – društvo Zeničko-dobojskog kantona“ d.o.o. Zavidovići (Službene novine Zeničko-dobojskog kantona broj:13/05), Nadzorni odbor društva putem elektronske pošte i telefona dana 17.09.2015.godine donio je slijedeću:

ODLUKU

I

Ovom odlukom usvaja se Pravilnik o unutarnjem redu i čuvarskoj službi Spomenika prirode „Tajan“ u Javnom preduzeću „Šumsko-privredno društvo Zeničko-dobojskog kantona“ d.o.o. Zavidovići.

II

Sastavni dio odluke čini Pravilnik iz člana I odluke.

III

Ova odluka stupa na snagu danom donošenja i ista će biti verifikovana na narednoj sjednici Nadzornog odbora .

Dostavlja se:

1. Nadzorni odbor J.P. „ŠPD ZDK“ d.o.o. Zavidovići
2. Uprava J.P. „ŠPD ZDK“ d.o.o. Zavidovići
3. P.J. Spomenik prirode „Tajan“



PREDSJEDNIK
NADZORNOG ODBORA
Osman Brkićević
Osman Brkićević, dipl.ing.maš.